

銓衡典

銓衡典第十八卷

銓衡總部總論三

明朱健古今治平略下 明銓選

明興立制文武並用文選主於吏部武選主於兵部兵部之選武臣其始也以功次而用其後也純用任子之法父死子繼無子者兄若弟繼之有定格也若夫都指揮以至都督則以才能擢用焉又不專於資格矣文臣入仕之途非一端其大要有三進士也監生也吏員也吏員資格止於七品用之爲佐貳幕職監當管庫之職非有保薦者不得爲州縣正員監生則出自學校之員選及舉人之肄業太學者循資以出先歷事於府部諸司然後次其名於選曹仍資考其高下而授以職進士初亦循其甲第以爲出身之差及其功績顯著則不資擢用往往拓越常調凡選歲引選六類選亦如之遠方選二朝覲之歲揀選一歲選教職者無常期選庶吉士會翰林院禮部御史會都察院凡陞必滿考不能久任不待考滿曰推陞類推上一人取旨單推上二人三品以上九卿及僉都御史祭酒廷推上二人或三人內閣吏部尙書勅推上二人或三四人皆請旨以署職試職實授莫年資以

裁革并省兼攝添設註選量繁簡以薦舉起廢徵召達雋異以帶俸添註寄恩冗以降調除名馭罪過以官程勤吏治以寧假悉人情此其大槩也洪武元年八月上諭中書省臣曰自古聖賢之君不以祿私親不以官私愛惟求廣賢才以治其民所以示天下至公也元朝出於沙漠惟任一己之私不明先王之道所在官司輒以蒙古色目人爲之長但欲私其族類羈縻其民而已非公天下愛民圖治之心也況奸吏從而蒙蔽之舞文弄法至朝廷之上賄賂公行苟且之政因循歲月上下同風不以爲怪末年以來其弊尤甚以致社稷傾危而卒莫之救卿等宜以爲戒選官之際慎擇其人勿徇厥弊是年勅北方守令以撫循之意命中書給賞以勵其廉恥復徵天下賢才至京授以守令上語中書省臣曰或言刑錢之任宜得長於吏才者掌之然吏多狡獪好舞文弄法故悉用儒者且自古儒者知古今識道理非區區文法吏可比也然今所用之儒多不能副委任之意何也豈選任之際不得實才歟卿等當夙夜究心苟非其才勿輕選用四年以季守道詹同爲吏部尙書諭之曰吏部者衡鑑也鑑明則物之妍蚩無所遁衡平則物之輕重得其當蓋政事之得失在庶官任官之賢否由吏部任得其人則政理民安任非其人則鰥官曠職卿等居持衡秉鑑之任宜在公平以辨別

賢否當是時天子寤寐英俊以開治統輸旌東帛交馳於四方初定金陵辟儒士范祖幹葉儀旣至訪道祖幹手大學以進曰具不出此書克婺州置行中書省召儒士許元胡翰等日會食中輪二人講經史治道克處州以書幣徵宿儒宋濂劉基章溢葉琛至入見上喜甚曰我爲天下屈四先生命有司創禮賢館處焉晚徵耆儒崇德鮑恂上海全思誠安吉余銓高郵張長年入見年皆七十餘上喜命坐顧問者良久並立爲文華殿大學士恂等固辭上曰卿等年固高朕不欲煩以政故授今官以輔導太子免早朝日宴乃後入不久且從卿志庶無負卿等生平爲鄉里光重其勿辭恂等固以辭乃賜勅禮遣之時孝廉人才及郡縣學所貢士若富戶耆民皆得見見稱旨卽擢不次而國子生奉命巡列郡廉官方吏治問察民間疾苦還稱旨卽擢用爲行省參政僉事知府等官至有擢僉都御史者患雜流爲民害也命國子監擇監生通經術者千人送銓部選州縣官賜遺有加作到任須知俾除授者就銓部領憑訖關須知讀旣至官畫一遵守毋爲具文時吏部奏主事員多欲以主事王性任戶部上不許曰自古設官分職以理庶務政有煩簡故官有多寡當因時制宜豈得盡拘一律乎況初入仕者政非素習事何由治職何由備哉自今六部官無得輕調如有年老者就本部陞

用尋命吏部曰古稱任官惟賢才凡郡得一賢守縣得一賢令足以致治如潁川有黃霸中牟有魯恭何憂不治今北方郡縣有民稀事簡者而設官與煩劇同祿入供給未免疲民可量減之於是吏部議減北方府州縣官三百八人久之又以官員聽選之在京者久住客邸日有所費甚至假貸於人使賢者喪其所守實朝廷待之者非其道也因令自今銓選之後以品爲差皆與道里費仍令有司給舟車送之著爲令上欲破資格用人謂吏部曰朝廷懸爵祿以待天下之士資格者爲常流設耳若有賢才豈拘常格今後庶官有才能居下位者當不次用之由是李文煥自西安知府費震自寶鈔提舉俱擢爲戶部侍郎其餘九十五人悉量才超擢郎中知府知州等官蓋一主於用人諸所定貢舉銓選考課法頗參前代之制而詳擇之然不專倚也已而廷臣有言比來儒士起自田里擢用驟峻非朝廷愛重名爵之意上曰朝廷爵祿所以待士彼有卓越之才豈可限以資格朕但期得賢名爵非所恡若曰起自田里不當驟用如伊尹在莘野孔明在隆中一旦加於朝廷之上遂建功立業何常拘於官職朕所患不得賢耳誠得賢而任之品秩非所限也已而給事有薦士者上曰宜何官對曰宜牧民又問其所長對曰其人才高年少勇於敢爲上曰才高多過中勇者少循理遽使

牧民未見其可夫年少未常歷練恃才輕忽用其血氣之勇鮮有不生事擾民者且令就學以養其德性變化氣質用未晚也又常諭吏部曰觀人之法有數等才德俱優者上才不及德者次之才有餘而德不足又次之苟二者俱無若逐勢變移任情威福言是行非此則小人不可用也成祖卽位申勅百官於吏部尤詳重略言圖惟求賢迫於饑渴其令內外諸司於群臣百姓中堪重任而沉滯下僚堪劇煩而優游散地抱德懷才而隱田里者各以名聞毋媚嫉蔽賢毋徇私濫舉已因吏部奏請選官諭曰銓選辨別邪正但當揆理不當任情揆理則以是非爲進退任情則以從違爲取舍尙其勗哉又言用人當各隨所長才優者治事德厚者牧民各有稱也有才者不必皆君子有德者必不同小人不可不察時有太祖時未仕者至建文中授以官後復以罪見黜尙書蹇義以請上曰天下人才皆皇考造就爲國家之用初興之主往往因才擢用可也時蹇義又上言在外官職惟承流宣化以撫字爲職必須得人然得人之道在銓選精嚴薦舉有法宜令在京文職七品以上近侍及外任五品以上至縣正官各舉所知吏部考驗擢用其所稱非才或授職之後闕茸貪污則連坐舉主上是其言命所司並行焉昭皇帝卽位首申重舉官之令謂廷臣曰君以求賢爲務臣以薦賢爲

忠人才大小皆有所用天下之廣豈無臯夔顏曾之徒誠得一人可勝千百宜悉心體訪勅在京七品在外五品以上及知縣舉賢才未仕者或淹下僚德性淳篤行止端方才能文學出衆者覈實薦舉聽擢用濫舉蔽賢者罰尋勅朝廷比數詔下求賢而奉行徇私或以賄賂或以親故得實才無幾將政何由理民何由安計自今嚴舉主連坐之法諭尙書義曰天下治亂在庶官唐太宗書刺史名於屏風朝夕省覽有善政疏其下故庶官効力致斗米二錢外戶不閉皇考亦常書中外官姓名於武英南廊至慎重也今府部官朕朝夕繼見得詢察其賢否若各省三司官乃旬宣大臣隆重矣而朕未親識其人又不悉其姓名卽聞其賢否邪正久不能省憶臣工善不善而上忘之於勸戒何有吏兵二部悉具各司官姓名履歷揭西序朕得親品騁焉又諭尙書言御史朝廷之耳目非老成識治體者不任新進小臣遽授斯職未達於治而操得爲之權遇事風生以喜怒爲威福以好惡爲是非甚者貪穢狼藉賢人君子正直不阿者往往被其陵挫小人阿順從諛則與爲膠漆於政事得失軍民利病略不省識亦烏在其爲耳目也爾吏部自今慎選擢以清風紀久之以武臣疎於事理而專軍法命選任方面參政副使等官於各邊參贊軍務治章奏督糧儲文臣協提督自此始也已命

擇國子監生有學行者十六人俾翰林嚴試拔其尤授六科尋擢爲給事中宣宗明聖以長年嗣位
閱天下治亂之故甚熟旣而踐祚下求賢詔出御製猗蘭操招隱詩賜大臣以風而文武重臣咸驩
然於君臣同遊之盛勅吏部言朕負荷洪業思得賢才以圖治理寢食弗忘間者勅朝臣三品以上
各薦所知示以猗蘭招隱之作庶幾在廷喻於朕志乃曠日積月所舉未聞豈盡無遺賢之可舉歟
何怠忽不稱也孔子曰十室之邑必有忠信況天下之廣生民之衆乎吏部申諭三品以上惟才行
文學者畢以聞又詔曰君國之道保民爲先當春和時萬物萌生而軍民曾未盡得所念何以答祖
宗基命之意乎夫布政按察司及府州縣官得人則政理民安非人則害被蒸庶而循資陞授將賢
不肖混淆求得人難矣吏部其令三品以上官保舉必得廉公端厚識治體能爲國爲民者充其各
處有文學才行出衆之士有司具以聞後有贓私罪坐舉者已大臣奏蘇州等九大郡號劇繁難治
擢郎中況鍾莫愚御史何文淵員外陸本深等知蘇常溫吉安等府上特召見宴勞焉是時重舉官
大臣奏舉賢能官者上爲降辭色慰藉之而廷臣巽慝無薦舉則降勅責焉至於各司府州縣官亦
得舉賢良方正一人上之部後有贓罪連坐已合臨御來三科進士親試文華殿拔其尤授修撰編

修評事等官進學文淵閣優待之命內閣考在外庶官有文學者六十人拔其良七人歷事六科而天下郡縣學生員年四十五上者考選送國子監令及時進用其官有贓罪卽復職常所得誥勅畢追奪于鼓舞人才之意盎然備矣正統初議者言府州縣正官專保舉則恩出於下宜循洪武永樂初制歸吏部選除大學士楊士奇言往藩憲二司及府州縣官不得人爲百姓患苦蓋以吏部權衡獨擅聞見不廣未盡得人故也宣宗皇帝勅命大臣保舉比多得人間有一二非才自緣舉主審覈不精及所司不行糾察之故豈其法弊哉況所舉官皆吏部審擇具奏得俞旨乃授非上允不得授恩固上出也昔唐太宗力行仁義命京官三品以上舉郡守縣令而天下昇平此其明効宣帝體祖宗之心行仁政此其首務奈何輕聽人言而改易焉且所言者實由鬬茸無藉之流不獲保舉遂營爲飛言欲隳良法耳可不加深察哉於是乃詔保舉如故而嚴舉官連坐之令已又勅曰牧民官縣令最親必得人而後民乃安近方面郡守由保舉率得人潔已奉公而知縣缺員未舉豈果難其人耶抑爲例拘不舉耶進士監生皆國家作養成才待用者何曾不省也自今進士觀政一年監生坐監三年以上有學識者由吏員入官歷兩考廉慎忠厚愛民者科道官各保舉以聞送吏部銓用又

命在京四品及國子監翰林院並得舉蓋實重守令已至天順初沿行之然天下要職悉出於三楊之門吏部拱手而已大略其間不無偏執而猶頗持公論嗣後張太后崩三楊相繼而沒王振用事雖名保舉而進退人才之權遂內移於中官自是邪正倒置賂賄公行朝謁者往往以饋遺之多寡異其能拙而貪饕成風所在掊克焉然當其時太阿旁落卽令選授總於選曹爲吏部者能自振否乎議者不察猥以保舉爲病何言之過也景泰初大臣保舉者多私所親故爲養交甚且有受賄囑而不得薦者因缺望爲流言銓部大臣亦頗以銓選權不盡由己也籍籍誹保舉於是御史張子初練綱等言御史從大臣保舉而任則大臣有過必鉗口卷舌而不敢言其有請囑必俯首帖耳而不敢異願停之以清弊源下禮部議部是御史言歸部銓已而綱復言吏部選授私外請復保舉而大臣以其議偏反無足錄也覆上下制曰朕期方面郡守得人令大臣保舉吏部推選乃彼此相蒙官不得人今惟布政按察使缺令三品以上會舉餘吏部訪求著爲令時長銓衡者王文端直以廷薦例罷益留意人才委任僚屬凡御史出巡歸者令報其優劣以備簡用繼之者爲王忠肅翱亦嚴加考察公銓注杜請託自是四方多號得人奔競之風爲之一息然至危易儲宮陞賞盈額官方稍穢

矣英皇復辟曹石輩怙奪門功權威熠奕一時冒勳陞秩者四十餘人則名器之濫不問可知自二凶授首乾剛獨奮而其時內閣李賢亦盡忠匡翼朝咨夕沃於是令冒職者自首免愆不數日間盡歸釐正臺閣爲之一清會重修通志簡擇儒臣而禁苑雜流摧顏外補至是舉數年闕冗之風掃飭殆盡自是罷郡守以下會舉例而兩司方面猶行保舉至是賢始奏令方面官缺吏部務推舉二人請旨簡用永遵爲例自是銓部得舉其職而時帝亦勵精求理命吏部擇內外臣僚爲郡守陞辭日召詣文華殿親諭訓勞咸給鈔爲道里費一日召學士賢諭曰今各邊革去文武巡撫以致軍官貪縱士卒疲憊其可舉進才能者用之賢因請曰遼東宣府大同延綏寧夏甘肅需才最急上復曰卿與王翱馬昂商議推選務在得人且曰多舉數人擇而用之賢退明日議推十二人以進上遂定浙江布政白圭遼東山東布政王宇宣府僉都李秉大同御史徐瑄延綏山西布政陳翌寧夏陝西布政芮鈞甘肅俱以京官巡撫其地又吏部侍郎孫弘聞喪上召賢曰孫弘豈勝吏部賢曰誠如聖諭弘以知縣考滿赴京爲忠國公石亨鄉里囑留又以奉迎功陞工侍復營就今職士林恥之上又恐其奪情卽令守制復召賢曰吏部侍郎乃人物權衡非他部可比必得其人先生以爲誰可賢曰

以在朝觀之無如禮部二人可擇一人用之復問其孰優劣對曰鄒幹端謹但規模稍狹姚夔表裏俱稱有大臣之風上曰然遂用之士皆稱悅有禮部郎李和者托一釋子囑權近求爲侍郎議論紛紛上以問賢賢對不知上悟復問吏部王翱亦不甚許他日以學士李紹對上復問賢對曰此公論也上意遂決明日除爲禮部侍郎初吏部舉賁銓爲戶部尙書上以問賢賢以銓貌不稱名舉年富執法不撓可居此職左右不悅富者甚衆謂賢不宜薦舉一日復召賢曰戶部之缺果誰當之恐非年富不可賢曰此人不悅者衆愈足見其賢也上曰如富之執法正宜居此國計所關豈顧私情不悅者哉遂召用之富經理財賦洫以勤廉不動聲色而出納節適云蓋英廟留心擢用如此則吏部不得專而亦不敢有所私矣時王翱蒞政嚴考察公銓注抑倖進杜請托嘗以官吏給由起復文憑過限多匿乃行覆勘法而奸人不得爲計取選故以硃書下緣爲奸糊塗莫辨翱易以墨弊遂絕翱時膺眷甚渥每用人必訪於翱翱亦以用賢報國爲己任焉故事日御晚朝廷臣等奏事甚悉輔臣密勿於用人尤謹每吏部具缺上或簡除或保薦皆公朝傳旨行之初非中官所敢專也永樂中傳奉方賓授兵部卽日赴任此簡除也宣德正統間用輔臣言重保舉之法景泰初命吏部專行至成

化中選授私舛頗請復保舉於是命京堂四品以上官具缺上而親簡除之已而權密下移廷臣患焉於是給事中沈瑤等言兩京四品以上官陛下親簡用之矣外方面官又廷臣保舉則吏部所司者何事宜令吏部過京堂官缺會內閣推方面官缺會同三品以上保舉防專聽之漸便上命查舊例得簡除事大怒曰此先朝舊規御史給事中顧不欲朕行豈薄朕耶於是廷臣不敢復言而傳奉出中官以爲常當是時太監張敏兄子苗以承差得太常丞乃傾敏貲爲獻乞侍郎不允得南通政於是白丁銅臭商販技藝若豪宦子弟率黃緣內侍進珍玩輒得官大者至太常卿通政丞不復關吏部謂之傳奉官多至數千人乃知唐疇咨四岳亦重僉謀周宰統百官亦隆推讓保舉公聽並觀而天曹參酌銓法固百世不能易也尋宦官汪直梁芳等相繼用事端進諸淫巧引用方術一時朝列亦植黨相援而翰林萬安獨無所交有李泰者內臣養子也安專與泰相結爲腹心尋以內閣闕人且欲用泰泰推安曰子先爲之我不患不至遂薦安陞禮部左侍郎兼學士入未幾泰暴死安在內閣初無學術日以囑託貪賄爲事又多結宦官爲內援凡所屬無問賢愚惟有內援者舉用初德貴妃萬氏侍憲廟於儲邸其父貴爲諸城邑吏至是以貴妃授都督兄通亦爲錦衣都指揮權寵震

耀通妻王氏出入掖庭安喜同姓陰使人結通之妻往來於家爲進妖僧繼曉以固其寵時江右李
孜省亦以小吏幻術與其徒鄧常恩俱驟躡要津安托孜省同鄉學士彭華深相結納凡附己者百
計拔之異己者百計去之一時詞臣若禮部侍郎邢讓祭酒陳鑑而方正之士如王恕馬文升耿裕
秦紘皆相繼逐時秉衡者安與劉珣劉吉而珣狂躁吉陰刻爭爲巧媚以固梯緣而爵賞之濫傾殫
帑藏無一匡救之者故時有紙糊三閣老泥塑六尙書之謠久之吏部尙書尹旻左都御史王越與
劉珣爲一黨安與彭華爲一黨互相詆傾珣黨一空舉朝側目莫敢顯訟其過先是國朝進退大臣
皆出宸斷天順間陞用大臣每畢宣吏部發玉音除授成化間始有吏部會官推舉之例其權遂歸
內閣每遇缺吏部必先謀之稍錯己意必令再推或諷所私言官論劾故吏部多與內閣相黨附尹
旻旣內恃奧援遂不比內閣而中官隱市徑竇多端孝宗改元舉傳奉官悉革而首擢王恕掌銓衡
恕在職裁抑僥倖褒獎名節甄拔淹滯中貴無敢請謁者而舊輔吉安等每有所軒輊恕亦瞞瞞不
輒撓初司樂徐啟端已經革罷尙書劉崧奏本寺缺官求復之恕議嗣位之初首罷傳奉官奔競稍
息今崧爲啟端復職是爲傳奉官立赤幟也若用一人將數百千相率而來豈勝煩擾事遂寢內旨

以通政司經歷高祿爲本司參議又上言祿出自科目自可達到而越次超陞恐非所以愛之也惟以天下之官待天下之士勿以親戚妨公議從之恕所執持多此類逮六年以後頗多內降官益冗時太宰屠濬執奏謂天下士事詩書而躬案牘秃銛鋒而竭筋力積數十年不可得官而白身之人乃或奔競技幸如拾芥然非振飭官方之軌也且今之傳奉卽漢西園之爵唐斜封之官宋內降之批也其爲政體累不淺矣濬繼恕柄銓政廣寄耳目以公考選進退黜陟無所避有監司以憂去任或言是人宜黜濬曰古者不伐有喪之國况無顯惡乃乘是黜之耶每注選至煙瘴地停筆久之必擇宜風土者因奏著爲令尤痛抑僥倖或造請者必置其人於遠地有貴近爲所識求京秩乃語其使曰爾主爲一士孰若爲一大臣耶必不允嗣是倪公岳馬公文昇俱甄拔公平愛惜名器弼成盛化豈偶然哉十五年文昇以人才乏缺宜加培養遂上疏曰高祖首開制科以經術爲本慎重進士之科而於京官尤加意焉何則後日內而卿正郎署外而方面府正俱於此出故凡在京官初入仕且令試職一年稱者實授否則別調此造養人才之端所當遵而弗易也自廢墜以來在京進士等官除授之後不悉心政務考證古今以致識見未充持守弗至一遇用人輒嘆乏才及至升擢外任

多有不稱任使三年之間罷黜者衆所以陞愈驟而退愈速卽今部無五年以上之員卽外無三年以上之司使日望陞遷怠忽政務治道未隆職此之故自今除曾經轉陞及一甲不試職外其餘主事給事中評事中書行人初除之際俱先令試職一年滿日考覈如果勤能不怠老成練達奏請實授若輕浮淺露怠惰不稱者改除外任庶人材造就任用不致於乏人舊制更新不致於廢墜而不舉矣已又議開行人博士兼除科道之例蓋自戊午以來孝廟御極十有餘年矣益明習機務勵精治平每至進用大臣及政事得失恆坐煖閣召文昇及學士劉健等反復密諭求其允當嘗召兵部尙書劉大夏都御史戴珊至幄中言爾等與各科道官諸所陳政務業行矣然使天下府州縣親民官非其人卽政何自行民何由被澤哉是諸所陳行徒文具無益也獨卿等其悉心體訪諸巡撫三司必慎簡得人爾珊更慎擇御史以巡方岳明黜陟庶有司得人而民可受福也一日召大學士劉健等諭之曰戶部覆處置流民事起用侍郎何鑑何以不會吏部健等對凡係本部承行從前亦間有徑推者上曰此前人之過也吏部以銓衡爲務推舉人才乃能職掌若使會推他日不稱亦無後詞是年令助教等官舉人出身經薦舉者兼取考選御史十八年又令舉人出身教官歷俸六年以

上有才行出衆者取選科道等官蓋寢欲就通融矣正德初許襄毅進掌銓政取人先行檢氣節而後才藝於抑奔競杜請託尤嚴時有結奧援覲京秩者進一日悉外補工侍某同里閨託閹營求改吏部進對衆面語之曰君年正未秩已不卑循資而往不憂不貴乃託斯人速化乎行取推官熊鳳文至文選司門不跪文選短其傲進曰爲推官已能不屈膝文選使爲御史肯畏強禦乎卒用爲監察御史先是銓選考畢不判名第於卷有請託者因得上下進每考畢卽看定卷面而以選簿挨填注選時有爲輔臣內弟者以上選囑進曰名第業已判定雖予亦無所庸力竟不從論者謂選法之公自王端毅以來一人而已然王處其易進處其難時逆瑾竊威福自宰輔已下多阿意承之進獨正色不倚一切請託泥不行而有賄瑾致囑者瑾亦往往難之以故在當時猶能自行其志使紀綱不至大壞者其清節偉望有以鎮之也已而學士焦芳黨張綏共擠進綏遂驟躡太宰益倚閹黨賣官鬻爵名器侈濫至文事則委之劉宇武事則委之曹元凡大小陞除皆以賄求及抵任朘削以償紀法紊替不可勝言後至楊一清蒞政稍黜邪祐正蘇釋凡逆瑾所構陷者連茹以進國是復定未幾世宗登極凡正德間巧立名色陞授者三千一百九十九員盡行革罷積年宿蠹一旦頓清海